

PANMAN CU A PONE SAN NICOLAS YORA GENIO MUSICAL CHONCHO TA DESPEDI AWE

Awe Francisco "Choncho" Boekhoudt, ta wordo hiba pa su ultimo lugar di sosiego, lagando un bashi den mundo cultural musical di nos isla. Mi no a bisa cu nos ta despedi di Choncho, pero cu awe Choncho ta despedi di e superficie di nos isla, e isla cu el a alegra cu su musica pa mas di 40 aña.



Choncho, e homber cu a pone San Nicolas yora algun aña pasa cu mi a logra pone siete steelband riba pia den centro di San Nicolas, despues di mas di 30 aña cu steelbandnan no a presenta aki. E anochi cu por a mira tocadornan di steelband yora di emocion tocando den San Nicolas pa e pueblo y cu por a mira e publico yora di emocion di por fin por a scucha steelbandnan riba caya, aunke den un show y no den parada. E pueblo unda Steelband a nace riba nos isla. Choncho, Jossy Lacle, y Mario Arends cu nan steelband, Bito & the Boys, e rumannan Connor, Rudy cu su Tradition Steel, Francis Jacobs y John Francis

cu nan grupo y grupo di stage di Noord Stars, a duna San Nicolas un anochi inolvidable, y pidi despues pa haci mescos na Playa, te cu Certified a pone su parkinglot disponibel y cu dialuna di Momito, turistanan a disfrutade despues di 12 or di anochi di musica di e gruponan. (un di e potrenan ta mustra parti di e publico cu a bini hunto na San Nicolas pa e anochi). E experimento aki a pone steelbandnan riba escenario pa e anochi di Steelband cu SAC a presenta ultimo 3 aña. Den e show di SAC, Choncho a dirigi un orquesta combina di tur otro steelbandnan, y denomina despues como Orquesta Nacional di Steelband, y toca e tumba "Dalia", e calypso St. Thomas y e clasico "El condor pasa" y tambe "Glory", na un manera cu nunca antes a scucha un steelband interpreta asina bunita, aregla y dirigi pa Choncho, kende ademá tabata toca e pan principal. Esaki ta recuerdonan grato cu Choncho a laga atras cerca mi, riba tereno di Steelpan, y mi a conoce tur for di 1948 bin dilanti. Choncho den su carera cu steelpan for di mey mey di decada 60 di siglo pasa a toca su steelpan cumisando cu su ruman Buchi Boekhoudt den Paradera Steelband, tocando Archie (buck them up) y e clasico "Glory" ..Despues el a toca cu Twinkle Stars cu Rolando y Betico Boekhoudt y despues cu Edwin (bankero di Aruba Bank) Tromp, el a forma Aruba Lovers, y ademá

el a toca tambe cu Aruba Sunny Isle Steel Orchestra. Cu tur el a haci grabacion di Long play. Choncho a toca den tur hotel di nos isla y den transcurso di añanan el a cuminsa lanza CD di steelband y a pone tres riba mercado. E ultimo como homenaje na 50 aña di carnaval.



Choncho tabata pa hopi aña un di e unico tres personanan, (su ruman Buchi y Patan Farro cu ne) cu tabata claba cilindernan di caha di orgel. Ta ultimo 2 aña a bini dos mas acerca. E tabata ademá un genio di caha di orgel y a saca riba mercado varios CD cu musica di Caha di Orgel, y por a mire ta toca den festivalnan di caha di orgel, pa actividadnan festivo di nos isla, na Bon Bini Festival, na hotelnan, y asina por sigui menciona. (riba potret por mire cu su ruman Mathilde Paskel tocando na Centro di Bario na Pos Chiquito den un di e festivalnan).

Choncho a forma parti di varios agrupacion tipico, y por a mire den tur clase di festival, si no ta cu Viool, ta cu baho, si no ta cu baho ta cu cuatro, si no ta cu cuatro ta cu mandolin, y otro biaha tambe como tocador di raspa, wiri of conga. E instrumentonan aki el a combina den su grabacionnan tropical tambe.

Dos CD cu cancionnan Tropical el a pone riba mercado, y poco mas di un luna pasa el a pone riba mercado "Piskado: Choncho y su ritmo



Tropical, volumen 2" y manera lto Tromp a skirbi.

nunca mester lubida. Choncho tabata mas grandi cu e mes por a pensa durante su bida. El a bay di nos mucho trempa, prome cu por a bise con grandi e ta, pasobra ningun hende por a spera cu Dios lo a tume den su reino asina lihe. Choncho tabata un di e musiconan, cu prome cu su grabacionnan subi mercado, e ta cerca mi, sea cu un "demo" of cu e CD graba caba, pa scucha y opina riba dje. "Piscado, Choncho y su ritmo Tropical 2" mi a ricibi sin bishita di Choncho. For di su cama na hospital, el a manda e CD pa mi y cu algun siman pasa mi a skirbi riba e hoy a aki.

Choncho for di awe no ta cu nos mas riba e isla aki, pero ningun di esnan cu a conoce e personahe aki, lo lubida kico el a significa pa nos cultura musical y ki genio e tabata musicalmente.

Riba tereno tipico y di nos folklore, nos a perde un personahe GRANDI! Choncho, drumi dushi!

Juby Naar.

